

BOSNA I HERCEGOVINA
FEDERACIJA BOSNE I HERCEGOVINE
UNSKO SANSKI KANTON
OPĆINSKI SUD U BOSANSKOJ KRUPI

Broj: 18 0 P 045755 20 P

Bosanska Krupa, 20.12.2022.godine

Općinski sud u Bosanskoj Krupi, sudija Maida Berberović u pravnoj stvari tužitelja „Sparkasse Bank, d.d. BiH, ul. Zmaja od Bosne br.7., zastupan kojeg zastupa punomoćnik Halapčić Dino advokat iz Bihaća, ul. Bedem 2/2 Bihać protiv tuženih Begović Asima iz Bužima (nepoznatog prebivališta) i Šahinović Suada iz Bužima, ul. Generala Izeta Nanića broj 49., radi isplate duga, vrijednost spora 12.107,94 KM nakon održane usmene, glavne i javne rasprave dana 17.11.2022.godine u prisustvu punomoćnika tužitelja i u odsustvu uredno pozvanih tuženih, dana 20.12.2022. godine, donio je sljedeću

PRESUDA

Obavezuju se tuženi da tužitelju solidarno isplate iznos od 12.107,94 KM, a koje se sastoji od:

- glavnice u iznosu od 4.448,69 KM
- ugovorene kamate u iznosu od 437,90 KM
- zatezne kamate obračunate od 09.06.2020. godine, u iznosu od 6.083,60 KM
- zakonske zatezne kamate u iznosu od 1.137,75 KM obračunate, počev od 10. 06.2020. godine pa do 04.11.2022. godine,
- zakonske zatezne kamate obračunate na glavnici počev od 05.11.2022.godine pa do konačne isplate, te da tužitelju nadoknade troškove parničnog postupka u iznosu od 3.567,20 KM sve u roku od 30 dana od dana prijema presude.

Obrazloženje

Tužitelj je po punomoćniku ovom sudu dana 15.06.2020. godine podnio tužbu protiv tuženih radi isplate duga u iznosu 10.970,21 KM. U tužbi tužitelj navodi da je sa prvotuženim dana 14.04.2008.godine zaključio Ugovor nenamjenskom kreditu broj 045-K-073/08 (14289/1) po kojem je prvotuženom odobren iznos od 10.000,00 KM sa rokom otplate od 72 mjeseca računajući od dana stavljanja na raspolaganje kredita prvotuženom. Istim Ugovorom određeno je da se predmetni kredit odobrava uz redovnu godišnju kamatnu stopu od 9,00 % koja je promjenjiva te da je tuženi na sve dospjele s neizmirene obaveze (naknade, glavnica, kamate, obavezan platiti uvećanu ugovorenu kamatu (kamatnu po dospjeloj) po stopi koja je za 6 procenitih poena na godišnjem nivou veća od redovne kamate. Tužitelj navodi da je u cijelosti izvršio svoju obavezu i kredit uredno plasirao prvotuženom, te je kao obezbjeđenje urednog ispunjenja obaveza iz Ugovora o kreditu, prvotuženi osigurao tužitelju i Ugovor o jemstvu, koje je tužitelj zaključio sa drugotuženim odnosno jemcem koji se obavezao ispuniti dospjelu obavezu glavnice dužnika. Kako tuženi nisu uredno izvršavali svoju obavezu u skladu sa Ugovorom i pored pismenih upozorenja tužitelj je tuženim uputio obavještenje o proglašenju prijevremenog dospjela od 05.12.2012.godine, te podnio tužbu kojom je potraživao ukupan iznos od 10.970,21 KM sa zakonskom zateznom kamatom i troškovima postupka.

Dostavljanje tužbe na odgovor prvotuženom je temeljem odredbe člana 348 stav 3 ZPP-a izvršeno istovremenim objavljivanjem na oglasnoj ploči suda i dnevnim novinama „Dnevni avaz“ koje se distribuiraju u Federaciji. Prvotuženi je dana 03.01.2022. godine primio tužbu na odgovor obzirom da je oglas objavljen u dnevnim novinama „Avaz“ dana 18.12.2021. godine. Prvotuženi je obavješten o objavi slanjem pismene obavijesti preko Pošte Općine pismonosnom pošiljkom na adresu posljednjeg poznatog boravišta.

Drugotuženi je u svom odgovoru na tužbu, zaprimljen dana 07.07.2020.godine istaknuo prigovor neurednosti tužbe, te je u cijelosti osporio kako osnov tako i visinu tužbenog zahtjeva. Na glavnoj raspravi u dokaznom postupku izvedeni su dokazi uvidom i čitanjem sljedećih materijalnih isprava predloženih od strane tužitelja: ugovor o nenamjenskom kreditu broj 045-K-073/08 od 14.04.2008.godine, uverenje o činjenicama iz službene evidencije Općinskog suda u Sarajevu broj 065-0-RegZ-14-004708 od 12.08.2014.godine – promjena naziva tužitelja, stanje duga na dan 09.06.2020.godine, dokaz o prenosu sredstava – analiza, od strane tuženog, ugovor o jemstvu broj 045-J-92/08 od 14.04.2008.godine, obavještenje o proglašenju prijevremenog dospjela od 05.12.2012.godine za prvotuženog i drugotuženog, pročitan je nalaz i mišljenje vještaka finansijske struke.

Ocjenujući naprijed provedene dokaze pojedinačno i u njihovoj međusobnoj povezanosti, u skladu s odredbom člana 8. ZPP („Sl. novine FBiH“ br. 53/03, 73/05, 19/06 i 98/15) utvrdeno su sljedeće bitne činjenice i odlučeno kao u izrazi presude iz ovih razloga: Uvidom u ugovor o nenamjenskom kreditu broj 045-K-073/08 od 14.04.2008.godine nesporno je utvrđeno da su tužitelj i prvotuženi bili u poslovnom odnosu, po kojem je prvotuženom plasiran iznos od 10.000,00 KM sa rokom otplate od 72 mjeseca uz redovnu godišnju kamatnu stopu od 9,00%. Ugovor je potpisan od strane prvotuženog i z.z. tužitelja te ovjeran pečatom tužitelja.

Temeljem uverenja Općinskog suda u Sarajevu broj 065-0-RegZ-14-004708 od 12.08.2014.godine sud je utvrdio da je Općinski sud u Sarajevu dana 10.07.2009.godine u sudski registar izvršio upis promjene naziva banke tako da je ranija ABS BANKA D.D. SARAJEVO promijenila naziv u Sparkasse Bank d.d. Sarajevo.

Sud je utvrdio nesporom da je stanje duga na dan 09.06.2020.godine iznosio 10.970,21 KM kako je glasilo prvobitno postavljen zahtjev tužitelja. Uvidom u Ugovor o jemstvu broj 045-J-92/08 od 14.04.2008.godine nesporom je dokazano da je ugovor zaključen između tužitelja i drugotuženog kao jemca, koji jamči za uredno ispunjenje novčane obaveze iz predmetnog Ugovora o kreditu, odnosno obavezuju se da će ispuniti obavezu da banci odnosno tužitelju izmiri novčano potraživanje koje ima prema korisniku kredita, na način i pod uvjetima pod kojima se obavezao i korisnik kredita. Ugovor su potpisali tužitelj i drugotuženi kao jemac, kao ugovorne strane i isti je za strane koje su ga potpisale obavezujući.

Uvidom u obavještenje o proglašenju prijevremenog dospjela od 05.12.2012.godine naslovljeno na tužene, utvrđeno je da je tužitelj sukladno predmetnom Ugovoru o kreditu, kao i Ugovoru o jemstvu pismenim putem obavijestio prvotuženog i drugotuženog da je potraživanje po osnovu Kredita dospjelo danom 05.12.2012.godine u iznosu od 6.434,84 KM uvećano za zateznu kamatu, i kojim se tuženi pozivaju da izmiri navedeno dugovanje prije pokretanja sudskog postupka.

Sud je utvrdio na osnovu svih izvedenih materijalnih dokaza, da tužitelj osnovano potražuje na ime duga ukupan iznos od 12.107,94 KM solidarno od tuženih. U nalazu i mišljenju vještaka ekonomske struke Bajrić Aldina utvrđeno je da se obaveze po predmetnom Ugovoru o kreditu sastoje od glavnice u iznosu od 4.448,69 KM koji se odnosi na glavni dug od 4.448,69 KM i ugovorene kamate od 437,90 KM, zatim iznosa od 6.083,60 KM po osnovu zatezne kamate od 09.06.2020.godine i obaveze po zakonskoj zateznoj kamati od 10.06.2020.godine do dana izrade nalaza i mišljenja u iznosu od 1.137,75 KM. Cijeneći nalaz i mišljenje vještaka finansijske struke, sud je došao do uverenja da je isti sačinjen u skladu sa pravilima struke, te na temelju stručnog znanja, te je isti prihvatio kao jasan precizno objašnjen i za koji stranke nisu imale prigovora pa sud nije niti imao razloga za sumnju u ovaako sačinjen nalaz i mišljenje.

Cijeneći navedeno sud je u odnosu na prvotuženog usvojio tužbeni zahtjev kao osnovan, a na temelju odredbe člana 1065. Zakona o obligacionim odnosima, koji propisuje obavezu korisnika kredita da banci plaća ugovorenu kamatu i dobijeni iznos novca vrati u vrijeme i na način kako je utvrđeno ugovorom, dok je u odnosu na drugotuženog usvojio tužbeni zahtjev kao osnovan, a na temelju odredbe čl. 414. i čl. 451. Zakona o obligacionim odnosima, jer je drugotuženi potpisao predmetni ugovor o namjenskom kreditu u svojstvu jemca i time se pored korisnika kredita obavezao da će ispuniti banci njeno potraživanje od korisnika kredita kao dužnika.

Tuženi su se ovom postupku držali pasivno, posebno drugotuženi koji je dao pisani odgovor na tužbu u kojem je samo osporavao urednost podnesene tužbe koje prigovore je sud cijeno kao neosnovane i neutemeljene, iz razloga što je tužba sastavljena u skladu sa odredbom iz čl. 53. ZPP-a pa sud ovako podnijet odgovor na tužbu smatra pašualno podnijetim posebno iz razloga što tuženi nije dokazao činjenice kojima osporava osnov i visinu tužbenog zahtjeva niti je pristupio na ročištu iako je od strane sud uredno pozivan. U odnosu na prvotuženog su se stekli uslovi za donošenje presude po osnovu propuštanja no kako je tužbeni zahtjev opredjeljen na solidarno ispunjenje obaveze to je sud pozivao i prvotuženog na ročištu putem oglasne table suda.

Kako je cjelokupno potraživanje dospjelo na naplatu, osnovan je i zahtjev za zateznu kamatu sukladno čl.277.st.1. Zakona o obligacionim odnosima, i to kako je zatraženo tužbenim zahtjevom jer su tuženi neplaćanjem novčane obaveze zapali u docnju. Odluku o troškovima postupka sud je donio temeljem odredbe čl. 383. čl. 386.st.1, čl. 387.st.2, čl. 396.st.1 i 3. Zakona o parničnom postupku („Sl. novine FBiH“ br. 98/15), u vezi sa čl. 12. i 13. i čl. 13. st.5. ta.9 i st.6. ta) Tarife o nagradama i naknadama troškova za rad advokata („Službene novine FBiH“ br. 22/04) koji troškovi su specifikirani od strane punomoćnika tužitelja, pa kako su tuženi u cijelosti izgubili parnicu, to su u obavezi nadoknaditi tužitelju, zastupanom po punomoćniku, troškove postupka i to na ime sastava tužbe, zastupanja na pripremnom ročištu od 03.10.2022.godine i ročištu za glavnu raspravu od 17.11.2022.godine u iznosu od po 842,40 KM, uvećano za PDV-om, troškove na ime vještačenja u iznosu od 350,00 KM, troškove na ime objave tužbe prvotuženom putem dnevnih novina u iznosu od 90,00 KM kao i taksu na tužbu u iznosu od 300,00 KM i taksu na presudu u iznosu od 300,00 KM shodno Zakonu o sudskim taksama (Sl.glasnik USK-a 10/19), a koji troškovi ukupno iznose 3.567,20 KM.

SUDIJA

Maida Berberović

POUKA O PRAVNOM LIJEKU:

Protiv ove presude dozvoljena je žalba Kantonalnom sudu u Bihaću putem ovog suda u roku 30 dana od dana prijema presude. Žalba se podnosi u dovoljnom broju primjeraka za sud i stranke

Na osnovu Odluke Vijeća Univerziteta u Sarajevu -Građevinskog fakulteta broj: 02-1-2332-1/22 od 09.01.2023. godine i Odluke Senata Univerziteta u Sarajevu broj: 01-2-26/23 od 25.01.2023. godine

UNIVERZITET U SARAJEVU UNIVERZITET U SARAJEVU - GRAĐEVINSKI FAKULTET Objavljuje KONKURS

- za izbor / napredovanje u naučnonastavno zvanje vanredni profesor za naučnu oblast „Konstrukcije“, dva (2) izvršioca sa punim radnim vremenom;

Kandidati za izbor u navedeno zvanje treba da ispunjavaju opće zakonske uvjete i minimalne uvjete za izbor u navedeno zvanja utvrđene Zakonom o visokom obrazovanju („Službene novine Kantona Sarajevo“, broj: 33/17, 35/20, 40/20 i 39/21) i Statutom Univerziteta u Sarajevu broj: 01-1093-3-1/18 od 28. 11. 2018. godine.

Detaljne informacije o uslovima koje trebaju ispunjavati kandidati i o dokumentaciji koju trebaju dostaviti kandidati objavljeni su na web stranici Univerziteta u Sarajevu: www.unsa.ba i web stranici Univerziteta u Sarajevu–Građevinski fakultet: www.gf.unsa.ba

Bosna i Hercegovina
Federacija Bosne i Hercegovine
Kanton Sarajevo



Općina Stari Grad Sarajevo
Općinski Načelnik

Bosnia and Herzegovina
Federation of Bosnia and Herzegovina
Canton Sarajevo

Municipality of Stari Grad Sarajevo
Municipality Mayor

Na osnovu člana 69. Statuta Općine Stari Grad Sarajevo-Prečišćeni tekst („Službene novine Kantona Sarajevo“, broj 20/13), člana 5. Pravilnika o dodjeli novčane pomoći djeci sa hroničnim oboljenjima i djeci sa poteškoćama u razvoju („Službene novine Kantona Sarajevo“, broj 43/22 i 49/22) i Pravilnika o dopuni Pravilnika o dodjeli novčane pomoći djeci sa hroničnim oboljenjima i djeci sa poteškoćama u razvoju, broj: 02-45-59/23 od 26.01.2023. godine, Općinski načelnik Općine Stari Grad Sarajevo objavljuje

JAVNI POZIV za dodjelu novčane pomoći djeci sa hroničnim oboljenjima i djeci sa poteškoćama u razvoju

- Pravo učešća na Javnom pozivu za dodjelu novčane pomoći djeci sa hroničnim oboljenjima i djeci sa poteškoćama u razvoju imaju djeca sa hroničnim oboljenjima i djeca sa poteškoćama u razvoju, roditelj ili staratelj djeteta, ako je djetetu za koje se traži priznavanje prava dijagnosticirano tjelesno oštećenje.
- Pravo na dodjelu novčane pomoći imaju djeca sa hroničnim oboljenjima do 18. godine života, odnosno do 27. godine života ukoliko se redovno školuju.
- Pravo na dodjelu novčane pomoći imaju djeca sa poteškoćama u razvoju, bez obzira na godine života.
- Djeca sa hroničnim oboljenjima su djeca oboljela od karcinoma, šećerne bolesti, leukemije, TBC, celijakije, kronove bolesti, ulceroznog kolitisa, hepatitisa B i C, epilepsije ili djeteta sa poremećajima autističnog spektra.
- Djeca sa poteškoćama u razvoju su djeca ometena u fizičkom ili psihičkom razvoju.

Pravo na dodjelu novčane pomoći djeci sa hroničnim oboljenjima i djeci sa poteškoćama u razvoju, ostvaruje se kao mjesečna novčana naknada u iznosu od 150,00 KM u toku kalendarske godine.

Pravo na dodjelu novčane pomoći djeci sa hroničnim oboljenjima i djeci sa poteškoćama u razvoju se može ostvariti, uz ispunjavanje sljedećih uslova:

- da je dijete državljanin BiH i da ima prijavljeno prebivalište na području općine Stari Grad Sarajevo minimalno jednu godinu dana ili u kontinuitetu za djecu mlađu od jedne godine
- da najmanje jedan od roditelja djeteta ima državljanstvo BiH, kao i prijavljeno prebivalište na području općine Stari Grad Sarajevo minimalno jednu godinu dana u kontinuitetu, računajući do dana podnošenja zahtjeva
- da je dostavljena medicinska dokumentacija iz koje je vidljiv status djeteta sa hroničnim oboljenjem ili za djecu sa poteškoćama u razvoju, Rješenje donijeto u skladu sa Pravilnikom o utvrđivanju preostale sposobnosti i razvrstavanju djece i omladine ometene u psihofizičkom razvoju

Rok za prijavu na Javni poziv je 15 dana od dana objave Javnog poziva u sredstvima informisanja, na oglasnoj ploči Općine i na web stranici Općine Stari Grad Sarajevo-www.starigrad.ba. Prijave na Javni poziv podnose se na propisanom obrascu, koji se može preuzeti u šalter sali Općine Stari Grad Sarajevo, šalter broj 3 ili na web stranici Općine Stari Grad Sarajevo, www.starigrad.ba (javni pozivi, konkursi i oglasi). Popunjen obrazac sa priloženom traženom dokumentacijom, može se predati lično u šalter sali Općine Stari Grad Sarajevo, šalter broj 4 ili preporučeno putem pošte na adresu, Općina Stari Grad Sarajevo Služba za boračko – invalidsku i socijalnu zaštitu (sa naznakom za “Javni poziv za dodjelu novčane pomoći djeci sa hroničnim oboljenjima i djeci sa poteškoćama u razvoju”), ulica Zelenih beretki broj 4, 71 000 Sarajevo.

Kompletan tekst javnog konkursa sa detaljnim uslovima koji su propisani i prijavni obrazac mogu se preuzeti na www.starigrad.ba (javni pozivi, konkursi i oglasi).

Broj: 08-37-20-48/23
Sarajevo, 07.02.2023. godine

OPĆINSKI NAČELNIK
mr. Ibrahim Hadžibajrić

Sarajevo, Zelenih beretki 4,
Centrala: 033/282-300, Info pult: 033/282-422
www.starigrad.ba
info@starigrad.ba



Bosna i Hercegovina, Federacija Bosne i Hercegovine, AGENCIJA ZA DRŽAVNU SLUŽBU
Босна и Херцеговина, Федерација Босне и Херцеговине, АГЕНЦИЈА ЗА ДРЖАВНУ СЛУЖБУ
Bosnia and Herzegovina, Federation of Bosnia and Herzegovina, CIVIL SERVICE AGENCY

Na osnovu člana 34. a u vezi sa članom 67. Zakona o državnoj službi u Kantonu Sarajevo („Službene novine Kantona Sarajevo“ br. 31/16 i 45/19), na zahtjev Općinskog suda u Sarajevu, Agencija za državnu službu Federacije Bosne i Hercegovine objavljuje

JAVNI KONKURS za popunu radnog mjesta državnog službenika u Općinskom sudu u Sarajevu

Radno mjesto:

- Stručni saradnik za izvršenje krivičnih sankcija- 1 (jedan) izvršilac

Integralni tekst javnog konkursa možete pogledati na službenoj internet – stranici Agencije za državnu službu Federacije BiH - www.adsfbih.gov.ba
Rok za podnošenje prijave počinje teći od dana objavljivanja javnog konkursa u „Službenim novinama Federacije BiH“.

DIREKTOR

Refik Begić, magistar uprave